

**HOTUBA YA WAZIRI OFISI YA WAZIRI MKUU: KAZI, AJIRA,
VIJANA NA WENYE ULEMAVU
MHE. JENISTA MHAGAMA (MB), KATIKA KILELE CHA
MAADHIMISHO YA SIKU YA AFYA NA USALAMA MAHALI PA
KAZI DUNIANI DODOMA, 28 APRILI 2016**

Mheshimiwa Mkuu wa Mkoa

Mheshimiwa Mkuu wa Wilaya ya Dodoma

Kamishna wa Kazi

Mtendaji Mkuu OSHA

Mkurugenzi Mtendaji ATE

Katibu Mkuu TUCTA

Mkurugenzi wa ILO

Wageni Waalikwa

Waajiri na Wafanyakazi wote

Mabibi na Mabwana

Napenda kuchukua fursa hii kumshukuru Mtendaji Mkuu wa OSHA na Wafanyakazi wote wa OSHA kwa kunikaribisha kuwa mgeni rasmi katika kilele cha maadhimisho haya ambayo waajiri na wafanyakazi wa Tanzania wanaungana na wengine duniani katika kuhimiza uboreshaji wa mazingira ya kazi ili kuzuia athari zinazoweza kutokea kwa sababu ya mazingira mabaya ya kazi.

Napenda pia kutoa shukrani zangu za dhati kwa Wadau wote wakiwemo TUCTA, ATE, ILO, Washiriki wa Maonyesho, Washiriki wa Tuzo ya Afya na Usalama Mahala pa kazi na washiriki wengine wote kwa namna moja ama nyingine walivyoshiriki kikamilifu katika

kuhakikisha kuwa maadhimisho ya siku hii ya leo yanafanikiwa. Wadau wote hongereni sana kwa kazi nzuri. Aidha napenda kutoa pongezi za kipekee kwa washiriki wa maonyesho kwa kutuonyesha kazi nzuri mnazofanya katika kulinda afya na usalama wa wanyakazi na jamii kwa ujumla.

Ndugu Wafanyakazi na Waajiri na wadau leo tumekutana hapa kuhitimisha madhimisho ya siku ya Afya na Usalama mahali pa kazi Duniani . Mwezi mzima wa Aprili umekuwa ni mwezi wa kufanya shughuli mbali mbali za kuongeza ufahamu wa masuala ya afya na usalama mahali pa kazi.

Shughuli hizo zilikuwa ni pamoja na kutoa mafunzo ya afya na usalama mahali pa kazi kwa wajasiliamali wadogo na kuendesha mikutano ya waajiri katika kanda zote sita. Aidha siku hii ni siku ya kufanya kampeni ya kimataifa ya kuboresha afya na usalama wa wafanyakazi inayolenga kuifanya kazi iwe ya hadhi na heshima kwa kuondoa hali zote hatarishi.

Ndugu Wafanyakazi na Waajiri siku hii ilikuwa ni siku ya wafanyakazi ambayo ililenga kuwakumbuka wahanga wa ajali na magonjwa yanayotokea kazini iliyoanza kuadhimishwa mwaka 1996. Baadae Shirika la Kazi Duniani (ILO) likaona haitoshi kuadhimisha siku hii kwa ajili tu ya kuwakumbuka watu walioumia na kupoteza maisha wakiwa kazini bali pia kuna haja ya kufanya juhudi za makusudi ili kuzuia vihatarishi vinavyopelekea kuumia na kupoteza maisha kwa wafanyakazi wengine. Hivyo, kuanzia mwaka 2003 pamoja na kuwakumbuka wahanga wa ajali na magonjwa mahali pa

kazi pia kumekuwa na kampeni za kuzuia au kupunguza ajali na magonjwa hayo yasitokee.

Katika kuzuia ajali na magonjwa ya kazi, maadhimisho ya siku hii sasa yana malengo yafuatayo: Kupanua uelewa kuhusu ukubwa na madhara ya ajali na magojwa yatokanayo na kazi miongoni mwa waajiri na wafanyakazi; Kuhamasisha namna ya kulinda afya na usalama wa wafanyakazi wakiwa kazini hasa tunapoelekea kuwa na uchumi wa Viwanda. Pia tutaendelea kusesitiza kuwa suala la Usalama na Afya Mahala pa kazi halina budi kuzingatia kanuni za kimataifa na Kuhamasisha mataifa wanachama wa umoja wa mataifa kujenga uwezo na utaalamu wa kuweka mifumo na sera zinazolenga kukinga wafanyakazi wakiwa kazini.

Wafanyakazi na Waajiri, ajali na magonjwa yanatokea sehemu za kazi kwasababu ya kutoboresha mazingira ya kazi, yanasababisha hasara kubwa sana. Hasara hizo ni kama kuongezeka kwa gharama za matibabu, Kupoteza baadhi ya viungo vya mwili, malipo ya fidia, uharibifu wa mali mbalimbali, kupotea kwa muda wa uzalishaji, kuingia katika gharama za kufundisha mfanyakazi mwingine iwapo aliyeumia hataweza tena kurudi kazini na kadhalika. Hasara hizo huongeza gharama za uzalishaji na husababisha kuongezeka kwa bei za bidhaa zinazozalishwa au huduma inayotolewa. Aidha hali hii husababisha kupunguza tija hali inayosababisha kudidimiza juhudi zetu katika mpango mzima wa kukuza uchumi na kuondoa umasikini.

Ndugu Wafanyakazi na Waajiri, kwa hali hiyo, sasa kuna haja ya kujenga utamaduni wa kuzuia ajali na magonjwa sehemu za kazi na huu ni vema ukawa ni mkakati ya kitaifa. Mkakati huu utaweka haki ya mazingira salama ya kazi kwa wafanyakazi, itakayoheshimiwa na watu wote katika ngazi zote kwa kushirikisha Serikali, Waajiri, Wafanyakazi na wadau wengine wakishirikiana wote kwa pamoja ili kuweka mazingira salama mahali pa kazi. Mkakati huo utaweka haki na wajibu wa kila mmoja wetu kuhakikisha kuwa msingi wa kuweka mazingira salama ya kazi ni kuzuia ajali

Ndugu, Wafanyakazi Waajiri, na wananchi kwa ujumla, ukiuliza wafanyakazi sababu ya ajali kutokea wengi wao watajibu kuwa ajali ni matokeo ya mazingira mabaya Mahala pa kazi na ukiuliza waajiri wao watajibu kuwa ajali ni uzembe wa wafanyakazi. Hii ndio inadhihirisha kuwa wafanyakazi na waajiri hawajui kwa ufasaha ajali au hata magonjwa ya kazini yanasababishwa na nini. Lakini jambo ambalo linawezekana kusababisha ajali kwa kiwango kikubwa ni makosa ya kibinadamu. Na makosa mengi ya kibinadamu yanakuwa ni kwasababu ya kutokuwa na utamaduni wa kuzuia hizo ajali au magonjwa.

Kujenga utamaduni wa kujikinga na madhara sehemu za kazi katika ngazi ya Taifa na hata katika sehemu za kazi ni muhimu sana ili kuboresha mazingira ya kazi. Uboreshaji wa mazingira ya kazi kunahitajika kuweka mifumo madhubuti ya afya na usalama mahali pa kazi ambayo ni kuweka sheria nzuri, kuimarisha ukaguzi, kutoa mafunzo kwa waajiri na wafanyakazi ikiwemo kutoa utalaamu. Ili

kufanikiwa katika hili waajiri na wafanyakazi kwa pamoja ni lazima wachukulie kwamba suala la afya na usalama mahali pa kazi ni sehemu ya mipango na mikakati ya uzalishaji au utoaji huduma.

Ndugu, Wafanyakazi na Waajiri, ndugu wananchi sambamba na hilo mnamo mwezi June 2006 Shirika la kazi Duniani (ILO) lilipitisha mkataba mpya wa kimataifa unaoitwa "Promotional Framework for Occupational Safety and Health Convention (No. 187)". Mkataba huo lengo lake ni kuweka msisitizo katika kutekeleza mikataba mingine iliyotangulia ambayo yote kwa pamoja ni kuendelea kuboresha mazingiara ya kazi ili kuzuia ajali, magonjwa yatokanayo na kazi na vifo katika nchi wanachama wake. Katika kufanya hivyo msisitizo umewekwa katika mambo matatu makubwa.

Mambo hayo kwanza ni kuwa na Sera ya Taifa ya Afya na Usalama Mahali pa Kazi; pili kuweka mifumo imara ya utekelezaji wa sera hiyo kama vile Sheria na Mamlaka zinazopaswa kutekeleza sera hiyo; na tatu kuweka Mikakati Madhubuti ya utekelezaji. Kwetu sisi Tanzania, wakati tunajiandaa kuridhia mkataba huo tayari tumeishaanza utekelezaji wa baadhi ya mambo kama sehemu ya maandalizi. Mfano Sera ya Taifa ya Usalama na Afya Mahali pa Kazi imeishapitishwa katika vyombo vyote vya Serikali na hivi sasa Serikali inaandaa mikakati wa utekelezaji. Marekebisho ya Sheria ya Usalama na Afya mahali pa kazi nayo yamefikia hatua nzuri. Tuna imani kuwa mkataba huo mara utakaporidhiwa utekelezaji wake utakuwa rahisi, na magonjwa katika sehemu za kazi yatafungua kwa kiasi kikubwa.

Ndugu Wafanyakazi na Waajiri, ningependa kuchukua fursa hii kuwataka waajiri kwa kushirikiana na wafanyakazi na taasisi mbali mabli za umma na binafsi kuhakikisha kuwa mifumo na sera thabiti ya kusimamia afya na usalama mahali pa kazi inawekwa sehemu zao za kazi ili kuzuia magonjwa yanayotokea Mahala pa kazi.

Ndugu Wafanyakazi na Waajiri katika kufanya maadhimisho haya, Shirika la Kazi Duniani (ILO) linatoa kauli mbiu ya kila mwaka ambayo inakuwa ni kwa dunia nzima. Mwaka huu tunapo adhimisha siku hii kauli mbiu ya mwaka huu duniani kote ni **“Msongo wa Mawazo Sehemu za Kazi: Ni Changa Moto kwa Wote (Workplace Stress: A Collective Challenge)”**.

Siku hizi duniani kote wafanyakazi wanakumbana na mabadiliko sehemu za kazi pamoja na mahusiano mapya sehemu za kazi. Hii ni pamoja na ushindani wa kibiashara, wateja kutarajia au kuhitaji bidhaa au huduma bora zaidi kwa wakati na kwa bei nafuu. Hii imepelekea waajiri kuhitaji wafanyakazi wao wafanye kazi kwa bidii zaidi kwa masaa mengi na kwa weledi ili kukidhi mahitaji ya wateja wao.

Aidha mdololo wa uchumi umesababisha waajiri wapunguze uzalishaji na kupunguza idadi ya wafanyakazi. Nafasi za ajira zimekuwa finyu, wafanyakazi wamekuwa na wasiwasi wa kupoteza kazi na wengine tayari wamepunguzwa kazi. Matokeo hayo yote ni kuwepo na vihatarishi vya kisaikolojia vinavyosababisha msongo wa mawazo mahali pa kazi miongoni mwa wafanyakazi.

Vihatarishi vya kisaikolojia sehemu za kazi ni muingiliano wa mazingira ya kazi, maudhui ya kazi, hali ya sehemu ya kazi, uwezo wa wafanyakazi kufanya kazi, utamaduni wa watu katika sehemu husika na mtizamo wa jamii ambayo inaweza kuathiri afya, utendaji wa kazi na kulidhika na kazi (job satisfaction). Mfano wa vihatarishi ni kama vile mazingira ya kazi kuwa hatarishi, kuwepo na michakato ya kazi (work procedures) zisizoshirikishi, kazi nyingi au ndogo kuliko uwezo wa wafanyakazi wenyewe, usalama wa ajira kuwa mdogo, muingiliano kati ya masuala ya kazini na nyumbani nk.

Vihatarishi vinaweza kusababisha madhara ya kiafya kama vile magojwa ya moyo na damu, magonjwa na mifupa na misuri, msongo wa mawazo na hata kufikia hatua ya kuuu mtu au kujiua. Inaweza pia kusababisha kubadili tabia ya maisha mfano kuvuta sigara kupita kiasi, unywaji wa pombe au Ulevi wa kupindukia, kula hovyoy bila kufuata misingi ya kiafya, kukosa usingizi wa kutosha nk.

Vihatarishi hivyo pia vinaweza kuhusishwa na kuongezeka kwa wafanyakazi kutohudhuria kazini au wafanyakazi wengine kuja kazini wakiwa na matatizo ya kiafya, wafanyakazi kukosa morali ya kufanya kazi na kujituma kwa bidii, wafanyakazi kuacha kazi au kutamani kuacha kazi, wafanyakazi kukosa umakini na ufanisi katika kazi nk. Vitu vyote hivyo vina fanya kampuni husika kukosa ushindani wa kibiashara na kampuni nyingine na kushuka kwa tija katika kampuni husika. Sehemu ya kazi huwa ya mashaka na hali ya kutojiamini kazini miongoni mwa wafanyakazi.

Ndugu, Wafanyakazi na Waajiri napenda kutoa wito kwa waajiri kwa kushirikiana na wafanyakazi kufanya juhudi za pamoja ili kuondoa hivyo vihatarishi vya kisaikologia. Upande wetu sisi serikali kwa kupitia OSHA tutakuwa tayari kutoa msaada na ushauri wa kiufundi wa namna ya kupunguza au kumaliza vihatarishi hivyo.

Ndugu, Wafanyakazi, Waajiri na wadau tunapokutana kama hivi sio vibaya tukakumbushana masuala ya VVU na Ukimwi kwa kuwa mpaka sasa hakuna tiba pamoja na kuwa yapo madawa yanayo punguza makali ya virusi na kuongeza maisha ya waathirika. Wafanyakazi ndio wako katika hatari kubwa ya kupata maambukizo. Kwa hiyo kama lilivyo kwa ajali na magonjwa yanayotokana na kazi ni lazima tujenge utamaduni wa kuendeleza mapambano ya kutatua matatizo yanayo tufanya tusifikie lengo letu. Matatizo hayo ni kama vile kutokuwa na elimu ya kutosha kuhusu ukimwi, kuwepo ukimya mkubwa, unyanyapaa, kuendekeza ngono zembe, rushwa ya ngono sehemu za kazi, na vitendo visivyo vya haki kwa waathirika wa ukimwi.

Kama ilivyo katika mtizamo wa Dunia kwa sasa ni lazima tufanye mambo matatu ambayo ni kutokomeza maambukizo mapya ya VVU, kumaliza kabisa vifo vinavyotokana na UKIMWI na kuondoa kabisa ubaguzi na unyanyapaa. Serikali ya Tanzania imepitisha Sera ya Taifa ya Kudhibiti UKIMWI ya mwaka 2012 na Mkakati wa Tatu wa Taifa wa Kudhibiti UKIMWI (2013 – 2017) ambapo lengo ni katika kinga na matibabu ya VVU. Mkakati wa Tatu wa Taifa wa Kudhibiti UKIMWI, ni

muhimu kushughulikia makundi muhimu ya watu walio hatarini kuambukizwa VVU badala ya wananchi kwa jumla, na wafanyakazi ni moja kati ya makundi muhimu sana.

Ndugu Wafanyakazi na Waajiri, Serikali ya Awamu ya Tano imedhamiria kufufua upya uchumi wa viwanda. Katika kufufua uchumi huyo kutakuwepo na uwekezaji mkubwa katika viwanda na ajira nyingi zitapatikana ambazo zitafanya Wantazania wengi zaidi kuajiriwa. Pia katika mnyororo mzima wa thamani ya ufufuaji wa viwanda hivyo, zitakuwepo shughuli mbali mbali kama vile usafirishaji, ongezeko la kilimo cha mazao ghafi, ukuaji wa sekta ya utoaji huduma nk. Aidha katika siku za karibuni tumeshuhudia jinsi sekta ya ujenzi inavyokua kwa haraka na kuongezeka kwa majengo makubwa nchini hasa katika majiji ya Dar es Salaam, Mwanza, Arusha, na Mbeya.

Tumeona katika kipindi cha takribani miaka kumi iliyopita kumekuwa na ongezeko kubwa la uwekezaji katika migodi ya madini mbalimbali kama vile dhahabu, uraniumu, madini ya vito n.k. Nchi yetu pia imegundua gesi asilia, uchimbaji wa gesi hiyo umeanza na utafiti zaidi unaendelea. Pia inawezekana tukagundua mafuta ya petrol kwa kuwa dalili zipo kubwa. Swali la kujiuliza ni kuwa ni gharama gani tutakazolipa kwa ongezeko la uwekezaji huo? Jibu lake ni rahisi. Katika uwekezaji huo kuna na kutakuwepo na ongezeko kubwa la vihatarishi. Wafanyakazi watakao jihusisha na shughuli zote hizo watakabiliwa na vihatarishi vya afya na usalama vya aina mbalimbali kulingana na shughuli watakazokuwa wanazifanya.

Hali hiyo itasababisha ajali na magonjwa yatokanayo na kazi kwa wafanyakazi wetu na kuingia gharama mbalimbali iwapo hatutaanza kujiwekea tahadhari endelevu. Kwa upande wetu sisi Serikali tumejipanga kukabiliana na vihatarishi hivyo. Kwa hiyo ningependa kutoa wito kwa wadau wote watuunge mkono ili tuweze kupambana na vihatairishi hivyo. Sisi kama Serikali tutatoa miongozo mbalimbali ya namna ya kukabiliana na vihatarishi hivyo na tutawaomba wadau wafuate miongozo hiyo.

Serikali pia inathamini juhudi za makampuni ya umma na binafsi au waajiri kwa ujumla kwa kushirikiana na wafaanyakazi wanaojituma katika kuboresha mazingira ya kazi wao wenyewe bila kusukumwa. Hivyo kwa kupitia Wakala wa Usalama na Afya mahali pa Kazi (OSHA), Serikali imeanzisha tuzo maalumu kwa watu watakao kuwa wanaonyesha juhudi katika kuboresha mazingira ya kazi kwa kuweka mifumo ya afya na usalama kazini iliyoimara. Napenda kuchukua furusa hii kuzipongeza kampuni zilizofanikiwa kupata tuzo mwaka huu.

Mwisho ningependa kuisitiza kuwa, serikali kamwe haitapuuza suala la Usalama na Afya Mahala pa Kazi na hivyo itaendelea kushirikiana na wadau wote ili kupunguza au hata ikiwezekana kuondoa kabisa vifo, ajali, magonjwa na madhara yatokanayo na kazi.

Baada ya kusema hayo napenda kuwashukuru wote mlioshiriki kikamilifu katika maadhimisho haya.

ASANTENI KWA KUNISIKILIZA.